

大清畿輔先哲傳

名臣傳一

大清畿輔先哲傳第二

天津徐世昌撰

王熙

弟燕

王熙字子雍一字胥庭號慕齋崇簡子生而穎異五六歲卽能誦孝經學庸論語父崇簡爲講解大義有疑卽問輒驚人十五爲諸生順治三年舉京兆試明年成進士選授國史院庶吉士習滿書六年授檢討分校壬辰會試十年試滿書拔前列世祖召見弘文院命以滿語奏對大加褒賞隨升國子監司業賜滿文洪武寶訓三國志二書尋轉左春坊左中允充順治大訓纂修官甲午命譯書經升司經局洗馬召入南苑譯勸善書及大學衍義一日上猝至直幄閱所譯書喜諭閣臣稱善久之遂令長直南苑十一年隨獵賜乘御馬是科館選庶吉士特命熙引見南苑升右春坊

右諭德充孝經衍義纂修官十三年初設日講官以熙同學士麻勒吉胡兆龍等充之御試滿書復第一賜御服貂裘是秋升左春坊左庶子 上幸景山臻祿閣召日講官五人進講熙講書堯典稱旨命每日進講侍坐駕出卽隨行不必請旨十四年升弘文院侍講學士充經筵講官七月擢弘文院學士 上諭曰父子同官古今所少以爾誠恪特加此恩十五年教習庶吉士秋主武會試授翰林院掌院學士兼禮部侍郎以學士三年考滿加禮部尙書銜時崇簡已長禮部父子同部尙書海內榮之十八年 上不豫日入請安御榻前正月六日漏三下召入養心殿諭曰朕勢將不起爾詳聽朕命撰詔書熙匍伏飲泣筆不能下 上諭抑悲痛卽榻前起草熙拭淚書第一條進恐聖躬過勞奏移乾清門下撰擬凡三次進覽皆報可日入始脫稿 世祖竟於是夜上賓熙一慟

幾絕其面奉憑几之言決大策定大議終身不以語人雖子弟莫得而傳也四月改授弘文院學士兼禮部尙書十二月以禮部尙書管左侍郎事康熙五年擢都察院左都御史疏言藩臬兩司總理錢穀刑名守巡各道分蒞各府州縣職任綦重近來督撫因其地近情親互相容隱糾劾無聞請敕部嚴定徇庇之罪得旨如所請六年疏言六部漢官一司之事專委之郎中其員外郎主事僅積俸待遷而已自後應照滿洲例各勤職業其不辦事者卽行劾罷今各省官倉抽分造船等事已歸有司管理宜停遣部員其戶部工部漢主事各員當酌議省減在京六衛管徵錢糧所設守備千總實爲閒冗亦宜裁併又陳官員貿易之害謂近日聞廣江西湖廣等省官員多自置貨物售之所屬兵民或指稱藩下挾勢橫行放債取利省會要區徧置官商占踞盤剝致小民以貿易爲生

者顛連失業請下部議自今以後凡閩廣江楚等省王公將軍督撫提鎮大小官吏如有持已資與民爭利及姦商借藩下勢橫行者所管官不能覺察及已發覺而循隱不以實奏者嚴定處分著爲令甲又見任官員捐助銀米博取議敘每云設法捐輸夫設法之中何可究詰名出私橐實則取自民間況其中誇張鋪敘捏少爲多是又徒有捐助之虛名更屬無益近者別項捐納雖停而修城備振及修造軍器等項仍有紀錄之例如遇降罰亦得抵銷終非所以飭勵廉隅昭垂法守祈敕下部詳議凡係地方見任文武官員捐助敘錄之例概行停止又近例招民百家優授知縣夫縣令宰治百里撫綏眾民關係匪輕儻有不肖之輩授以此職則百姓之累無窮況招民百家送至盛京往來之貲非數千金不足夫不惜數千金而欲得一縣令則借資爲市其心可知旣欲謀利其

一邑之民安危可知臣愚以爲嗣後招民百家之人應給與閒散官名色頂帶牌扁旌獎勿授以理民之職又見今流徙寧古塔尙陽堡犯人認工釋罪令其修蓋城樓部院衙門此等犯人流徙之時家產已盡籍沒入官能認造此數萬金城樓之工價從何而得不過借認工爲名指稱奉旨取回視原籍稍可給之家挾詐逼勒一不給與動稱違誤欽工交官追取良民受害而姦惡之人愈益縱誕不知畏忌此例應卽停止凡所上疏皆得政體大指歸於子惠萬民培養元氣每奏上輒報旨未嘗不稱善下部議或行或格而其疏要爲不可易也會天旱金星晝見上諭各部院例繁滋弊上千天和熙疏請酌復世祖舊章以昭政典謂先帝御極有年憂勤圖治各部院應行事宜皆經詳定盡善無遺茲者數年以來有因言官條奏改易者有因各部院題請更張者有會議興革者

法經屢變則例繁多反啟各衙門任意輕重乘機作弊之端自古
聖賢之君莫不以敬天法祖爲兢兢皇上當勵精圖治之日法祖
卽所以敬天臣請敕下部院各衙門詳查見行事例有應遵世
祖時典制者具題改正施行卽比年以來因時定例實有便於今
日國計民生者亦須詳察始末條晰不得不然之故具陳統候裁
奪畫一永遵上覽疏嘉歎於是世祖舊章次第酌復中外臚之熙
在臺二十有一月所建白甚眾其懲貪崇儉獎廉疏銓法課官學
諸疏皆鑿鑿可施行當是時宇內初定而三藩各擁重兵吳三桂
駐雲南耿精忠駐福建尙可喜駐廣東皆予王爵三桂兵尤強擅
署置官吏浸驕蹇萌異志子應熊以尙主居京師多聚姦人散金
錢交通四方中朝皆憂之莫敢先發言熙獨疏言直省錢糧大半
耗於雲貴閩廣之兵餉就雲貴言本地賦稅不足供十一勢難經

久臣愚以爲滇黔已平綠旗額兵亟宜汰減卽藩下甲兵亦宜遣散屯糧則勢分而餉亦裕命下部臣核議歲省餉銀一百餘萬蓋陰裁抑之也七年升工部尙書兩視孝陵大工十一年從耕籍田明年轉兵部尙書是歲十二月吳三桂反晝至一夕都城內外所在皆火尋有朱三太子之獄捕繫百千人掠治訖不得主名皆其子應熊之黨爲之聖祖以其尙主不忍誅十三年三月熙上疏曰逆賊三桂負恩謀叛肆虐滇黔毒流蜀楚散布僞劄惑人心今大兵已抵荆南剋期進勦元惡指日授首獨是叛子吳應熊素憑勢位黨羽眾多擅利散財蓄養亡命依附之輩實繁有徒今雖被羈守而種種流言譌傳不止姦謀百出未易周防大寇在外大惡在內若不早斷貽禍匪輕且大逆不道不限籍之同異皆處斬三桂逆天叛主今古罕聞討平之後脅從尙可邀恩而首惡必無

可赦應熊之當誅戮無待再計而決者亦何庸緩其斧鑕而不以
安天下之心哉爲今之計惟速將應熊正法傳首楚蜀以寒老賊
之膽以絕羣姦之望以激厲將士兵民之心今應熊親隨人等發
禁刑部者不下五六百人眾則難防時久則易玩請敕法司鞫
訊情罪重者立決次者分給各旗以絕禍本章下議政王貝勒大
臣九卿科道會議應熊尋伏法始三桂憑藉其子爲內應西煽秦
隴東蔓江浙自恃兵勢朝廷必不殺其子以爲之招故上書多嫚
語及應熊伏誅三桂驚悸舉軍慟哭竟以是患發病死人皆躡熙
之特見能聲大義云十四年充冊立皇太子副使尋奉諭專管密
本漢官與聞兵機蓋自熙始十七年丁父憂服闋卽家授保和殿
大學士兼禮部尙書時黔南甯平海內苦兵革久熙爲相務以和
平寬大宣上德意與民休息造次敷陳必歸於忠厚將之以誠敬

奉法循紀不敢失尺寸其有應奏請變革者必酌乎人心公論之同然直言於上前無隱平生不沽譽不市恩不立黨每論事闕廷指畫可否具有經緯聞者咸歛容欽服其性無鉗忌能容眾尤樂獎進人才賓禮後進經史能隨事舉述大義絕不以賅治自矜撰擬文字屬同官具藁點定一二字深中事理詩詞頌賦閒進於上問則奏曰實代作非老臣所及不欲取先詞館諸臣也在帝左右或危論或微言隨事諷諫率能動上聽平定三逆後開方略館一日諭閣臣曰當三桂初反時漢官有言不必發兵七旬而有苗格者又其時漢官盡移其妻子回家何也顧學士韓爌曰汝爲朕載之葵商之熙熙曰待縛我之東市君乃載耳因大言於閣中曰有苗格乃會議時魏蔚州語告者截去首尾遂失其本意然若如其言豈不誤國漢官移家偶然耳亦多有否者日久何從分別耶翌

日入見懇懇如閣中語 上笑曰朕固知此兩事不可載也事遂寢熙子克善克勤皆 世祖賜名克善能文熙不令與試又屢辭典會試戊辰會試 上特命爲主考常從游宴諸閣臣多不與賜席寵堂扁曰曲江風度寵眷日加歉然若不自勝求退之懷未嘗一日釋三十一年以足疾請解任詔不許三十四年復請告溫旨慰留如初三十六年丁丑以年七十引年以請復奉有宣力兩朝久贊機務眷倚方殷不必引年之旨逾年擬再請 上先諭閣臣斷來章遂不果三十九年復請 上仍降旨慰留不忍其去也明年疾大作大學士伊公以狀奏行在 上命賜寶露上藥服之病少閒復具疏申前請始准以原官致仕特加少傅兼太子太傅先是 太祖實錄成加太子太傅至是進少傅 上特以榮其去往者致仕諸大臣無有也是年十月遣侍衛賜帑幣上珍明年上元節賜宴於家四

月遣侍衛捧手書至榻前賜扁聯臨米芾書一幅勸其勉強餐食
輔以醫藥以慰朕不忘舊臣之至意熙匍伏感泣命子克昌孫景
曾隨侍衛詣暢春園謝恩復傳諭如病少愈朕尙欲一見故熙遺
疏謝恩有冀臣病之再甦許瞻天之有日蓋紀實也四十二年上
元節復賜宴於家熙彊起進一箸遂卒年七十六 上聞震悼特
命皇長子直郡王率滿大學士及禁近諸貴臣至喪前命王行三
叩禮舉哀諸大臣等同跪舉哀道路擁觀父老多泣下漢大學士
九卿詹事及百執事之長皆欷歔感動合疏謝恩蓋從來所未有
也內閣請易名之典 上親定諡曰文靖雍正八年入祀賢良祠
熙內行完備十二歲母梁病篤禱於天者四晝夜母沒哀號昏絕
口鼻出血升餘父崇簡抱置懷中食頃始甦侍父事無鉅細必稟
命逢先世諱日崇簡必集子姓齋宿外舍熙率先致敬家在京師

每朝退朝夕溫清與兄弟共之春秋佳日輒侍父遊西山諸勝又恐勞於登陟乃構怡園於宅之西偏築亭臺植花木以養其志侍疾躬治湯藥不敢頃刻離左右父沒號泣如孺子顏其書屋曰慕齋兄弟六人簪笏相重恆遺書戒勉以國恩家訓再得恩蔭皆推與其弟助其內外姻戚之不給者崇簡素所與交故人子弟周卹之終其身未嘗倦也自少天才敏捷工文章然不欲以此炫長其子克昌編其遺集凡二十四卷弟燕字子喜以父廕累任戶部郎中康熙二十四年授鎮江府知府令行禁止境內肅然三十一年陞江蘇按察使聽讞無一留獄嚴守律例不敢以意毫髮重輕屬吏奉燕指凡所上初招獄詞亦無敢翫法行私者七郡之獄稱平三十三年晉湖廣布政使是時楚省設鼓鑄局藩司董其役宿弊叢集私鑄倍於官鑄榆莢縋環十不當一上下官吏相漁獵以爲

利藪莫肯摘發其事者燕白督撫罷其事其他收支抑勒輸納重耗諸弊悉釐革之州縣奏銷之費歲派取於民間者嚴予禁絕有費卽身任之閱四載而湖北藩庫無復浮冒虛詭者三十七年授都察院右副都御史巡撫貴州貴州彫敝民不知禮教燕以廉潔導羣吏凡關民生教養者次第舉行因具疏言黔省師儒之官諸多未備各州縣衛有初未立學宮者有學無官而附試他郡者請依滇南故事通省建學設官悉依小學例取文武生員八名廩貢亦舉行如例又言全黔荒田十居三四墾經數歲然後收穫而所入薄不足輸稅故人懷觀望之心儻依減則寬以六年未有不鼓舞爭赴者賦雖減重就輕田則易荒成熟是於國稅原無損也均下部議行四十五年疏稱苗人掠劫有司處分特重黔地熟苗供辦徭賦非野苗可比特一旦負罪而竄入叢篁深箐難以立禽儻

卽議有司降黜去官則人才可惜且參罰旣重諱盜者必多請限
年追緝依漢民爲盜議處下九卿廷議從之燕善拊循苗人時頒
條教飭州縣官吏無縱姦人詐索土司鎮寧州民曹邦傑妻張氏
夫亡從死法不應旌燕力爲請上特許之民尤傳頌焉撫黔三
年積勞咯血疏乞骸骨不許越二載疾益劇四十二年更申前請
詔允致仕去黔之日遠近軍民苗獮遮道拜送有相顧泣下者家
居六年卒年五十有七賜祭葬如例

朱之弼

弟之佐

朱之弼字右君號幼菴大興人順治三年進士選授禮科給事中
遷工科都給事中之弼歷司言職抗直無阿苟利國家不避權貴
疏言體統尊卑原有定分褻體統而索尊卑者莫如胥吏加銜舊
例胥吏供役三四年積勞議敘選用佐貳今戶兵等書役別繫職

銜既奔走本衙門之中復趨蹌卿大夫之列非官非吏有玷班行
且此輩出身貧賤不數年間家資巨萬食用服飾窮極奢華非舞
弊何以致此況戶兵各官遷轉無常而此輩子孫世守官如客而
吏如主流弊何窮請嚴查斥革庶名器重而弊蠹消下部議行六
年分校禮闈逾年丁父憂九年服闋補戶科疏言小民納糧一也
其目有漕糧白糧軍糧恤孤糧四種人皆樂軍糧恤孤糧遲緩無
增耗之費有力之家往往營求撥兌派漕白於單弱之戶苦樂不
均害一兌軍糧必行折色軍得銀則沿途妄費掛欠之弊由此害
二兌恤孤糧半飽豪強鰥寡孤弱無所控告害三請敕漕臣糧道
親督州縣畫一編徵盡數輸納敢有撥兌者治罪又言錢糧侵欠
兵食不充今侵欠之大者莫若漕欠與糧欠漕欠宜責總漕巡撫
親督糧道糧欠宜責督撫親督布政今年帶完某年之欠若干逾

限不完均以溺職論嚴立考成其姦弁侵虧及有司怠緩從事者
參處如此閱一年則銷一年之欠官有責成而舊欠可清又言國
家章程大備六部各有成書儻部臣實心任事利自知舉弊自知
革言官不過拾遺補闕而已六部任事之人視國事如家事猶恐
廢弛今則盡若事外之人疑事畏事之念多任勞任怨之意少事
稍重大則請會議遷延日月行查而已不然聽督撫參奏科道指
糾而已不然苟且塞責無容再議而已上下推諉以爲固然彼此
相安以苟歲月如此國家之事安得不廢百姓安得不困而欲望
致太平必無之事也今日之治惟在擇人而久任之責其成效以
定賞罰伏乞 皇上召諸大臣親試才品因能授任復考其歷事
後興革幾何視成效多少以定功罪而行賞罰無少姑息則人知
法之必行而事舉矣未幾除太常少卿歷右通政宗人府府丞擢